

REGLUGERÐ

um möskvastærðir í togvörpum, möskvamæla og mæliaðferðir.

1. gr.

Lágmarksmöskvastærð í botnvörpu og flotvörpu skal vera 155 mm, sbr. 6. gr.

Botnvarpa og flotvarpa merkir skv. 1. mgr. 1. gr. og 2. gr. vörpur sem notaðar eru til veiða á helstu botnfisktegundum hér við land og tekur ekki til varpna, sem notaðar eru til veiða á sérstökum nytjastofnum eins og humri, rækju, kolmunna, spærlingi og fleiri tegundum, sem háðar eru sérstökum leyfum.

Með poka skv. reglugerð þessari er átt við aftasta hluta vörpunnar. Allir pokar skulu jafn breiðir eftir endilangri lengd þeirra og skulu þeir annað hvort skornir á síðum eða legg, ef um leggpoka er að ræða sbr. þó a. lið 12. gr. Óheimilt er að nota umbúnað af nokkru tagi til að koma í veg fyrir rennsli fisks aftur í poka.

2. gr.

Prátt fyrir ákvæði 1. mgr. 1. gr. er skipum, sem stunda veiðar með botnvörpu og flotvörpu á þeim svæðum sem tilgreind eru hér á eftir, heimilt að nota riðil með lágmarks möskvastærðinni 135 mm í allt að 25 öftustu metrum poka vörpunnar.

a) Á svæði fyrir Vestur- og Suðurlandi utan línu, sem dregin er 320° réttvísandi frá stað $66^\circ 17' N$ og $24^\circ 00' V$ og 12 sml. utan grunnlínu, vestur og suður að línu sem dregin er um eftirgreinda punkta:

1. $64^\circ 44' N$, $24^\circ 27' V$
2. $64^\circ 44' N$, $24^\circ 12' V$

og þaðan utan línu sem dregin er 5 sml. utan við Geirfugladrang og þaðan utan 4ra sjómílna frá grunnlínupunktum suður og austur um að $18^\circ 00' V$ og þaðan í réttvísandi 180° í stað $63^\circ 17' N$, $18^\circ 00' V$ og þaðan utan línu sem dregin er um eftirgreindra punkta:

1. $63^\circ 41' N$, $15^\circ 30' V$
2. $64^\circ 19' N$, $12^\circ 26' V$
3. $64^\circ 25' N$, $12^\circ 11' V$
4. $64^\circ 40' N$, $11^\circ 26' V$

og þaðan utan línu, sem dregin er í réttvísandi norður út að mörkum fiskveiðilandhelginnar.

3. gr.

Lágmarksmöskvastærð humarvörpu skal vera 80 mm.

4. gr.

Lágmarksmöskvastærð rækjuvarpna skal vera 45 mm í vængjum aftur að þaki (miðneti) en 36 mm í öðrum hlutum rækjuvörpunnar.

Við veiðar á rækju innan viðmiðunarlínu á svæði frá Bjargtöngum norður og austur um að Rauðanúp skal nota net á legg í a.m.k. fjórum öftustu metrum vörpunnar.

5. gr.

Lágmarksmöskvastærð botnvarpna og flotvarpna sem notaðar eru til veiða á loðnu skal vera 16 mm, spærlingi 20 mm og kolmunna 38 mm.

6. gr.

Við möskvamælingar skal nota möskvamæla, sem þannig eru gerðir:

1. Hlutar möskvamælis eru: Mælistika, aflmælir fyrir 0–6 kg. átak og lóð með tveggja og fimm kg massa.
2. Mælistika, sem nota skal til að mæla möskvastærð skv. reglugerð þessari skal vera 2 mm þykk úr traustu efni og þannig gerð, að hún aflagist ekki. Stikan skal mjókka fram á við í hlutfallinu 1 á móti 8 hvoru megin. Breidd stikunnar skal merkt á 1 mm bili. Á efri enda stikunnar skal vera gat nægilega stórt til að notast sem handfang og á neðri enda skal vera gat til að hengja í lóð. Á efri enda skal ennfremur vera gat til að festa aflmæli við stikuna.

7. gr.

Við mælingu möskva skal mælistiku beitt þannig:

1. Netið skal strekkt svo að möskvar teygist eftir lengdarlínu þess.
2. Mjórrí enda á stiku sbr. 6. gr. skal stungið í möskvann hornrétt á netið.
3. Stikunni skal stungið inn í möskvann annaðhvort með handafli eða með því að nota lóð eða aflmæli, þar til mælirinn stöðvast á skásettu hliðunum vegna viðnáms frá möskvum.
4. Leggmöskvi skal teygður milli upptökuhnúta þegar stikunni er stungið í hann.

8. gr.

Við val á möskvum til mælingar skal eftirfarandi gætt:

1. Þeir möskvar sem mæla á skulu mynda röð af 20 samliggjandi möskvum, sem velja skal eftir lengdarás vörpunnar. Eigi skal mæla möskva sé hann viðgerður, slitinn eða eitthvað fest í hann.
2. Möskva skal ekki mæla nær leisum, burðarlínum og kolllínu en 4 möskvum.
3. Eingöngu skal mæla net þegar þau eru blaut og ófrosin.

9. gr.

Stærð hvers möskva skal vera breidd mælistikunnar þar sem hún stöðvast þegar henni er beitt sbr. 7. gr.

10. gr.

Möskvastærð netsins, sem mælt er skv. 7. – 9. gr. skal vera meðaltal mælinga einstakra möskva gefið upp með 0.1 mm nákvæmni.

Skekkjumörk við mælingu möskva skv. þessari reglugerð skulu vera 3%.

11. gr.

Eftirlitsmaður skal mæla eina röð af 20 möskvum sem valdir eru skv. 8. gr. og skal hann stinga mælinum inn í möskvann með handafli án þess að nota lóð eða aflmæli. Síðan skal möskvastærðin reiknuð skv. 10. gr.

Sýni útreikningur á möskvastærðinni að möskvastærð sé ekki í samræmi við gildandi reglur, skal velja tvær raðir af 20 möskvum til viðbótar skv. 8. gr. og þær mældar. Þá skal reikna möskvastærð aftur skv. 10. gr. og taka með í útreikninginn þá 60 möskva sem þegar hafa verið mældir og skal þessi útreikningur skera úr um möskvastærð netsins.

Mótmæli skipstjórinn niðurstöðu mælingar sem fengin er skv. 2. mgr., skal netið mælt að nýju. Við endurmælingu skal nota lóð eða aflmæli festan við stikuna og ræður eftirlitsmaður hvort notað er. Lóðið skal festa við gatið á mjórri enda stikunnar með króki. Aflmælinn skal festa við efri enda stikunnar.

Mæla skal þannig eina röð með 20 möskvum á ofangreindan hátt og skal meðaltalið gilda sem endanleg meðalmöskvastærð viðkomandi nets.

Við mælingu á vörpum, sem hafa möskvastærðina 45 mm eða minna skv. 4. og 5. gr. skal nota 19.61 newtona afl (sem samsvarar 2ja kg þyngd), en á aðrar vörpur skal nota 49.03 newtona afl (sem samsvarar 5 kg þyngd).

12. gr.

Við veiðar er óheimilt að nota nokkurn þann útbúnað sem þrengir, herpir eða lokar á nokkurn hátt möskvum þeim sem getið er um í 1.–2. gr. reglugerðar þessarar. Þó er heimilt að:

- a. festa undir allt að 25 öftustu metra botnvörpu net með sömu möskvastærð og er í pokanum í því skyni að draga úr sliti. Slitvara þessa má festa við pokann að framan og til hliðar og einnig er heimilt að festa slitvarana við styrktarnet efra byrðis að aftan sbr. c. lið þessarar greinar. Á óskiptum poka (sekk) er ennfremur heimilt, að öftustu tveir metrar pokans séu þrengdir á leisum.
- b. festa undir slitvara þá er getið er í a. lið nautshúðir, mottur úr gerviefnum eða aðra sambærilega slitvara í því skyni að auka enn núningsþol pokans.
- c. festa styrktarnet úr sama efni og varpan er gerð úr við allt að 18 öftustu metra efra byrðis botnvörpu og efra og neðra byrðis flotvörpu. Möskvastærð styrktarnetsins skal vera rúmlega tvöfalt stærri en möskvastærð vörpunnar þar sem það er fest við. Heimilt er að festa styrktarnet þetta við pokann að framan, til hliðar og að aftan, sbr. b. lið þessarar greinar.
- d. nota styrktargjarðir utan um pokann á allt að 25 öftustu metra botnvörpu og flotvörpu. Bil á milli gjarða skal vera minnst 1.8 m en heimilt er að festa öftustu gjörðina nær kollínunni. Lengd gjarða skal vera minnst 45% af strengdri lengd netsins á þeim stað sem gjörðin er.
- e. festa innan á neðra byrði botnvörpu húð eða mottu til að auka núningsþol pokans vegna grjóts, sem berst í pokann. Stærð þessara hlífa má mest vera 4 m² alls í hverri botnvörpu.

13. gr.

Við veiðar með botnvörpum og flotvörpum samkvæmt 4.–5. gr. er heimilt að nota hlífðarpoka utan um pokann sjálfan. Lágmarksmöskvastærð slíks hlífðarpoka skal vera 80 mm.

Þegar notaður er hlífðarpoki sbr. 1. mgr. við rækjuveiðar utan grunnlínu, sbr. reglugerð nr. 299/1975 um fiskveiðilandhelgi Íslands, er heimilt að binda fyrir hlífðarpokann að aftan. Annars er óheimilt að nota net eða hvaðeina til þéttingar poka að aftan.

Heimilt er við veiðar með botnvörpum samkvæmt 3.–5. gr. að festa undir 8 öftustu metra vörpunnar nautshúðir eða mottur úr gerviefnum í því skyni að auka núningsþol pokans.

14. gr.

Eigi ná ákvæði þessarar reglugerðar til fiskveiða í þágu vísindalegra rannsókna. Ennfremur er ráðuneytinu heimilt að veita sérstök tímabundin veidileyfi í tilraunaskyni þar sem notaðar eru vörpur með annarri möskvastærð en fram kemur í reglugerð þessari.

15. gr.

Brot gegn ákvæðum reglugerðar þessarar varða refsingu samkvæmt ákvæðum laga nr. 81 31. maí 1976, um veiðar í fiskveiðilandhelgi Íslands og laga nr. 34, 17. maí 1976, um veiðar íslenskra skipa utan fiskveiðilandhelgi Íslands. Um upptöku afla fer samkvæmt ákvæðum laga nr. 32 19. maí 1976, um upptöku ólöglegs sjávaraflla.

16. gr.

Reglugerð þessi er sett samkvæmt ákvæðum laga nr. 81 31. maí 1976, um veiðar í fiskveiðilandhelgi Íslands og laga nr. 34, 17. maí 1976, um veiðar íslenskra skipa utan fiskveiðilandhelgi Íslands til að öðlast gildi 1. janúar 1991 og birtist til eftirbreytni öllum þeim sem hlut eiga að máli. Jafnframt er frá sama tíma felld úr gildi reglugerð nr. 125 5. mars 1979, um möskvastærðir botnvörpu og flotvörpu ásamt síðari breytingu nr. 353 30. júlí 1984.

Ákvæði til bráðabirgða.

I

Prátt fyrir ákvæði 1. og 2. gr. reglugerðar þessarar er heimilt til 1. janúar 1993 að nota botn- og flotvörpu með lágmarksmöskvastærðinni 135 mm. Þó skal lágmarksstærð möskva í a.m.k. 8 öftustu metrum vera 155 mm nema þegar togveiðar eru stundaðar á eftirgreindum svæðum:

- a) Á svæði fyrir Vestur- og Suðurlandi utan línu, sem dregin er 310° réttvísandi frá stað 66°00'N, 25°15'V, og utan línu, sem dregin er frá stað 66°00'N, 25°15'V, í stað 64°53'N, 25°15'V og þaðan í 90° réttvísandi í stað í 12 sjómílna fjarlægð frá grunnlínu samkvæmt reglugerð nr. 299/1975, síðan í 12 sjómílna fjarlægð frá grunnlínu suður og austur um að 19°50'V þaðan í stað 63°06'N, 18°00'V síðan í 65° réttvísandi að 10°00'V og þaðan 90° réttvísandi út að mörkum fiskveiðilandhelginnar.
- b) Á tímabilinu 1. september til 31. desember á svæði milli 18°00'V og 21°00'V. Að norðan markast svæðið af línu, sem dregin er 6 sjómílnur utan við grunnlínu samkvæmt reglugerð nr. 299/1975.

II

Prátt fyrir ákvæði 6. gr. skal heimilt til 1. maí 1991 að nota möskvamæla sem gerðir eru til mælinga á möskvum samkvæmt 6. gr. reglugerðar nr. 125 5. mars 1979 um möskvastærðir botnvörpu og flotvörpu.

Sjávarútvegsráðuneytið, 21. desember 1990.

F. h. r.

Árni Kolbeinsson.

Jón B. Jónasson.

AUGLÝSING**um breytingu á gjaldskráum rafveitna.**

Samkvæmt 25. gr. orkulaga nr. 58, 29. apríl 1967, hefur ráðuneytið staðfest eftirfarandi breytingar á gjaldskráum rafveitna er taki gildi 1. janúar 1991:

Gjaldskrá Rafmagnsveitu Reykjavíkur, nr. 2, 12. janúar 1990:

Allir liðir gjaldskrárinnar hækki um 5%

Gjaldskrá Rafveitu Hafnarfjarðar, nr. 439, 25. september 1989, með síðari breytingum.

Allir liðir gjaldskrárinnar hækki um 5%

Iðnaðarráðuneytið, 21. desember 1990.

F. h. r.

Björn Friðfinnsson.

Guðrún Skúladóttir.